



Bošnjačko nacionalno vijeće  
Bosniac National Council  
Национални савет бошњачке националне мањине



**REPUBLIKA SRBIJA**  
**VLADA REPUBLIKE SRBIJE**  
**Aleksandar Vučić, premijer**

Nemanjina 11,  
11 000 Beograd

**PREDMET:** Zahtjev Bošnjačkog nacionalnog vijeća za obustavljanje od izvršenja Odluke o budžetu Grada Novog Pazara.

Skupština Grada Novog Pazara je na sjednici održanoj 28.11.2014. godine Odluku o budžetu Grada Novog Pazara za 2015. godinu objavljenu u Službenom listu Grada Novog Pazara br. 8. od 01.12.2014. godine. U ovoj odluci nisu predviđena budžetska sredstva kojima se finansira rad Bošnjačkog nacionalnog vijeća za 2015. godinu.

Prema čl. 114. Zakona o nacionalnim savjetima nacionalnih manjina „sredstva za finansiranje rada nacionalnih saveta obezbeđuju se iz budžeta Republike Srbije, budžeta autonomne pokrajine i budžeta jedinice lokalne samouprave, donacija i ostalih prihoda.” Članom 115. st. 5. sredstva “koja se obezbjeđuju u budžetu jedinice lokalne samouprave raspoređuju se, u skladu sa odlukom nadležnog organa jedinice lokalne samouprave, nacionalnim savetima koji predstavljaju nacionalne manjine koje u stanovništvu jedinice lokalne samouprave dostižu najmanje 10% od ukupnog stanovništva ili nacionalnih manjina čiji je jezik u službenoj upotrebi na teritoriji jedinice lokalne samouprave.” Statutom Grada Novog Pazara u čl. 5. je propisano da je na teritoriji Grada Novog Pazara u službenoj upotrebi ravnopravno srpski i bosanski jezik. Također, prema rezultatima posljednjeg popisa stanovništva, broj Bošnjaka u Novom Pazaru iznosi preko 80% od ukupnog broja stanovnika.

Zaštitnik građana Republike Srbije je u preporuci del. broj 9190 od 02.04.2013. godine već utvrdio da je Grad Novi Pazar načinio propust u radu jer u budžetu za 2013. godinu nije predvidio sredstva za rad Bošnjačkog nacionalnog vijeća. Zaštitnik građana je u istom aktu izdao preporuku da se odlukom o izmjeni budžeta Grada Novog Pazara obezbede sredstva za rad Bošnjačkog nacionalnog vijeća. Grad Novi Pazar nije postupio prema preporuci Zaštitnika Građana.

I pored preporuke Zaštitnika građana, kao i činjenice da su ispunjena oba uslova iz čl. 115. Zakona o nacionalnim savjetima nacionalnih manjina, Skupština Grada Novog Pazara nije planirala sredstva za rad Bošnjačkog nacionalnog vijeća u budžetu za 2015. godinu.

Statutom Grada Novog Pazara, u čl. 15. st. 1. tač. 33. je propisano da stara se o ostvarivanju, zaštiti i unapređenju ljudskih prava i individualnih i kolektivnih prava pripadnika nacionalnih manjina i etničkih grupa“, dok je u tač. 41. navedeno da Grad „pomaže rad organizacija i udruženja građana“, a Bošnjačko nacionalno vijeće je organ koji u skladu sa zakonom predstavlja bošnjačku nacionalnu zajednicu .

Bošnjačko nacionalno vijeće napominje da je odlukama o budžetu opština Tutin, Sjenica i Prijepolje, već predviđeno finansiranje sredstava za rad Bošnjačkog nacionalnog vijeća u skladu sa zakonom.

Neodređivanje budžetskih sredstava za rad Bošnjačkog nacionalnog vijeća, Grad Novi Pazar je u velikoj meri onemogućio Bošnjačko nacionalno vijeće da vrši nadležnosti propisane ustavom i zakonom. Na ovaj način, su pripadnici bošnjačke nacionalne zajednice stavljeni u neravnopravan položaj jer je Bošnjačko nacionalno vijeće organ putem kojeg ostvaruju svoja kolektivna prava garantovana Ustavom, zakonom i međunarodnim pravom.

Iz navedenih razloga, Bošnjačko nacionalno vijeće smatra da Odluka o budžetu Grada Novog Pazara za 2015. godinu nije u skladu sa čl. 114. Zakona o nacionalnim savjetima nacionalnih manjina i predlažemo da Vlada Republike Srbije na osnovu svojih nadležnosti čl. 81. Zakona o lokalnoj samoupravi obustavi od izvršenja Odluku o budžetu Grada Novog Pazara za 2015. godinu.

Mjesto: Novi Pazar  
Datum: 22.12.2014.  
Broj: 99/1-01/2014



Predsjednik Vijeća,  
Dr. Sulejman Ugljanin

*Sulejman Ugljanin*